

ԳՐԱԿԱՆ

ՏՐՅ. ՅՈՎՀԱՆՆԷՍ ՊԵՏՐՈՍԵԱՆ

Գ. Լինժայարանի շրջանաւարտ

ԱՌԱՔԵԼ ՍԻՆԵՅԻՆ ԵՒ ՆՐԱ ԳՐԱԿԱՆ
ԺԱՌԱՆԳՈՒԹԻՒՆԸ

Քանալի բառեր. Առաքել Սինեցի, Աղամգիրք, բանաստեղծ, մանկավարժ, տաղեր:

Key words: Arakel Syunetsi, poet, pedagogue, verses.

XV դարի սկզբի նշանաւոր փիլիսոփայ, բանաստեղծ, մանկավարժ, մատենագիր, հոգեւոր և հասարակական գործիչ Առաքել Սինեցին Տաթևի դպրոցի վերջին մեծ ներկայացուցիչն է: Աշակերտել է XIV դարի մեծ մտածողներ՝ Յովհան Որոտնեցուն և Գրիգոր Տաթևացուն: Եղել է վերջինիս քրոջ որդին և Սինիքի արքեպիսկոպոսը:

«Ձսե՛ծ վարդապետն իմ դասասաց,

Գրիգոր անուն պատճառ բարեաց,

Յիշէ յաղօթս ձեր առ աստուած...

Ջիմ սե՛ծ րաբունապետն յոյժ իմաստասէր

ՋԳրիգոր սե՛ծ ճգնագգեաց աղերսէք առ տէր...

Ձսե՛ծ վարդապետն իմ հանճարեղ...»¹:

Թէեւ Սինեցուն վաստակն անգնահատելի է հայ մշակույթի պատմութեան մէջ թէ՛ բանաստեղծական արուեստի, թէ՛ գիտութեան և արուեստի բնագաւառներում, սակայն, պէտք է նշել, որ գիտական և յատկապէս գեղարուեստական բազմաբովանդակ ժառանգութիւն թողած այս հեղինակի մասին կենսագրական տեղեկութիւններ մեզ գրեթէ չեն հասել:

Ենթադրուում է, որ նա ծնուել է XIV դարի յիսունական թուականներին և մահացել մօտ 1425 թուականին: Սակայն, ինչպէս Առաքել Սինեցուն «Աղամգրի» քննական բնագիրը կազմած և հրապարակած Ա. Մաղոյեանն է նշում, Առաքել Սինեցուն՝ աշխարհով մէկ սփռուած ձեռագրերի նիւթը դեռեւս ամբողջութեամբ չի դրուել շրջանառութեան մէջ, և նրա թողած մեծ ժառանգութիւնը պէտք է հանգամանօրէն ուսումնասիրել²: Նման ուսումնասիրութիւնները բնականաբար կը նպաստեն Առաքել Սինեցուն կենսագրական փաստերի բացայայտմանը:

Լինելով «Սինեաց վերադիտող», այսինքն գլխաւոր տեսուչ, առաջնորդ, եպիսկոպոսապետ՝ Առաքել Սինեցին երկար տարիներ դասաւանդել է Տաթևի բարձրագոյն դպրոցում (համալսարանում): Ժամանակակիցները արտակարգ գովեստով են խօսում Սինեցուն մասին իբրեւ բանաստեղծի, իմաստասէր և առաքինի անձնաւորութեան: Տաթևի դպրոցի նրա դասընկերը՝ Թովմա Մեծոփեցին, նրա մասին գրում է. «...սե՛ծ իմաստասէր, քուերորդին սե՛ծ վարժապետին, որ ունէր զսիրտն իբրեւ զհրեղինաց. և էր

¹ Առաքել Սինեցի, Աղամգիրք, հրատարակեց Մ. Պոտուրեան, Վենետիկ, 1907, էջ 229, 271, 332 (յիշատակարանների մէջ), տե՛ս նաեւ Մ. Աբեղեան, Երկեր, հտ. Դ., Երեւան, 1970, էջ 421:

² Տե՛ս Առաքել Սինեցի, Աղամգիրք, աշխ.՝ Ա. Մաղոյեանի, Երեւան, 1989, էջ 3-4:

սիրող ամենայն առաքինությանը»³:

Գրիգոր Տաթևացին էլ 1407 թուականին իր Գիրք քարոզութեան՝ Ամարան հատորի յիշատակարանում գովեստով է խօսում Սիւնեցու մասին.

**«Նախ քեռորդոյն իմոյ ըստ մարմնի,
Ծընընդամիտ երգաբանի,
Առաքելոյ առաքինի,
Եւ Սիւնական գըլխոյ արհի»⁴:**

Վերջին տողից էլ իմանում ենք, որ Սիւնեցին եղել է Սիւնիքի «արհիմ», որ նշանակում է գլխավոր առաջին եպիսկոպոս, արքեպիսկոպոս ու առաջնորդ:

Առաքել Սիւնեցուց մեզ են հասել չափաժոյ բանաստեղծութիւններ, ինչպէս նաեւ «Մեկնութիւն կամ համառօտ լուծմունք սահմանաց՝ գրոց Դավիթ Անյաղթի», «Մեկնութիւն փերականութեան» աշխատութիւնները⁵: Հայ գրականութեան մէջ Սիւնեցին իր ուրոյն տեղն է գրաւում քնարական և խրատական քերթուածներով, պոեմներով ու ներբողեաններով: Նշանաւոր են նրա «Դրախտգիրքն»⁶ ու «Աղամգիրքը»⁷, որոնց մէջ Սիւնեցու մտահոգութիւնը մարդու ճակատագիրն է, նրա լինելութեան խնդիրը. հարց, որն այդ դարաշրջանում քննարկուող խնդիրների մէջ ամենակարեւորն էր՝ կապուած մարդու կեցութեան ու նրա կատարելագործման հետ: Հեղինակը աստուածաշնչեան և կրօնական թեմաների միջոցով անդրադարձել է իր ժամանակի բարոյական և հասարակական երեւոյթներին:

Առաքել Սիւնեցու չափաժոյ միւս երկերի շարքում հոգեւոր ու բարոյական բնոյթ կրող տաղերի մէջ թաքնուած են նաեւ սիրային բազմաթիւ հատուածներ: Այդպիսիներից է օրինակ. «Տարփմամբ սիրոյ փեղ տագնապիմ» տաղը, որը հիանալի սիրերգ է, նմանապէս՝ «Ահա բաղձամ փեղ ցանկալի», «Ահա մեծ լեռոն և ահագին» սկզբնաւորութեամբ տաղերը:

Քաղուածաբար՝ սիրային հատուածներից 19-ը քառեաններ, 1910 թուականին Մ. Կուզմինի թարգմանութեամբ հրատարակուել են ռուսերէն՝ «МОЛИТВА» (Աղօթք) խորագրով:

Քննադատներից ոմանք նկատի ունենալով նրա տաղերի թեթեւ ոճը, նկարագրական ճոխութիւնը, յատկապէս Աստուածածնի կերպարը կերտելիս («Գովք Աստուածածնի»), Սիւնեցուն համարել են աշխարհիկ սիրոյ և հոգեբանութեան երգիչ՝ նմանութիւններ գտնելով հայրէնների ու նրա քնարերգութեան միջեւ: Սակայն, կարծում ենք, Սիւնեցու տաղերի աշխարհիկ ձեւը չի բխում նրա աշխարհիկ զգացումներից: Նա խոր և համոզուած կրօնաւոր է, որը փորձում է միայն նորացնել և թարմացնել հին եկեղեցական ճնշող ոճը և իր կրօնական գաղափարները դարձնել աւելի մատչելի: Նրա նպատակը ոչ թէ սիրոյ ու գեղեցկութեան գովերգն է, այլ մարած և մարող բարեպաշտութեան, հոգեւոր զգացումների կենդանացումը, որի պակասը այնքան զգալի էր XV դարում: Հայոց եկեղեցին ու Հայոց դաւանանքը սրբութիւններ էին նրա համար:

Որոշ ստեղծագործութիւնների հեղինակային պատկանելիութիւնը յաճախ շփոթել են, վերագրելով դրանք կամ Առաքել Սիւնեցուն և կամ Առաքել Բաղիշեցուն: Ինչպէս օրինակ Առաքել Բաղիշեցու գործերից «Աստուածածին կոյս պատուական»

³ Պատմութիւն Լանկ-Թամուրայ և յաջորդաց իւրոց, արարեալ Թովմա վարդապետին Մեծոբեցոյ, Փարիզ, 1860, էջ 51:

⁴ Գ. Տաթևացի, Գիրք Քարոզութեան, Ամարան հատոր, Երուսաղէմ, 1998, էջ 721:

⁵ Ա. Սիւնեցու գործերի գնահատման և հրատարակութեան գործում մեծ դեր են կատարել Վենետիկի Մխիթարեանները:

⁶ Հրատարակուել է Վենետիկում՝ 1956 թուականին, բանասէր Ն. Տէր-Ներսիսեանի ջանկերով:

⁷ Հրատարակուել է երեք անգամ. Կ. Պոլսում՝ 1721, 1799 թուականներին և Վենետիկում՝ 1907-ին:

տաղը ձեռագրերում պատահում է նաեւ Առաքել Սիրնեցու անունով:

Ուսումնասիրողների մօտ աւելի մեծ է եղել շփոթութիւնը միայն «Առաքել» անունով յայտնի բազմաթիւ բնագրերի հեղինակային պատկանելիութեան խնդրում: Մեծ մասամբ, ըստ երեւոյթին, Սիրնեցու գործերը ընծայուել են Բաղիշեցուն⁸: Այս շփոթութիւնը Չամչեանից անցել է Զարպհանալեանին, նրանից Ղ. Ալիշանին և Յ. Տաշեանին: Մ. Պոտուրեանը շփոթուած տաղերի մի մասը ոճական ու տաղաչափական առանձնայատկութիւնների հիմնաւորմամբ վերագրում է Առաքել Սիրնեցուն: Սակայն, ըստ Մ. Աբեղեանի հաւանաբար կամ ստուգապէս դրանցից Առաքել Սիրնեցունն են մօտ յիսուն տաղ և մի մեծ աստղաբաշխական քերթուած «Վասն երկուսսան կենդանակերպիցն... ասացեալ ի յԱռաքել վարդապետն», որի մէջ կայ նաեւ այս տողը. «Տէր Առաքել գրեցի զայս բան»⁹:

Առաքել Սիրնեցու «Աղամգրի»-ը, տաղերը, ինչպէս նաեւ արձակ գրուածքները իբրեւ ներշնչման աղբիւր ունեցել են աստուածաշնչական, խրատական նիւթերը: Բացառութիւն են կազմում մի քանի կարճ տաղեր, որոնք արծարծում են աստղագիտական աւանդութիւններ: Իր գործերում նկատուում են տարրերի բազմազանութիւն, բարդութիւն, այլազանութիւն, որտեղ իրար են խառնում աստուածաբանը, քարոզիչը, բարոյախօսը, քնարերգակը, դիւցազներգակը, աղօթողն ու աշուղը: Ա. Զօպանեանի բնորոշմամբ «լեզուն ստորին գրաբարի և աշուղերէնի խառնուրդ մըն է»¹⁰: Նրա կարծիքով Առաքել Սիրնեցու տաղերի ստուար մասը ձանձրալի ու տափակ խրատաբանութեամբ են տոգորուած: Ըստ նրա, «Աղամգրի» երեք քառորդը անընթեռնելի է, թէպէտ այդ ամենաձանձրալի կտորների մէջ էլ՝ տեղ-տեղ պատահում են ուժեղ տողեր և հատուածներ: Թերութիւններ է համարել՝ երկարաբանութիւնները, կրկնութիւնները, ոչ ճիշդ բացատրութիւններն ու տգեղ կազմուած դարձուածքները: Այդ բոլորի պատճառը այբբենական տաղաչափութիւնն է, որը Սիրնեցին յաճախ է գործածել: Շատ յաճախ ստիպուած է եղել այբուբենի բոլոր տառերով սկսող տուներ շարելու համար դիմել կրկնութիւնների և աւելորդաբանութիւնների: Սակայն սա, այդ թերութիւնը բացատրող պատճառներից մէկն է միայն, գլխաւորը՝ ճաշակի պակասն է, գրական նուրբ կրթութեան բացակայութիւնը, որը դրսեւորել է նաեւ պարզ տաղաչափութեամբ գրուած տաղերում:

Այս «թերի» կողմերին անդրադառնալուց յետոյ Ա. Զօպանեանը Սիրնեցու գրութիւններից վեց-եօթ տաղ և «Աղամգրի» մէկ երրորդ մասը բաւական է համարել նրան հին գրականութեան մէջ փայլուն ու առանձնայատուկ տեղ տալու համար: Տաղերից ամենագեղեցիկներից են՝ «Առ բաղձալին Յիսուս» միստիկական սիրերգը, որը Մ. Պոտուրեանը 1906 թուականին հրատարակեց Բազմավէպում, երկու «Ներքող Աստուածամայ», ու «Վասն փառաց սրբոցն» տիտղոսով մի քերթուած¹¹: «Առ բաղձալին Յիսուս» տաղը, չափազանց երկար է, զմայլելի տներ է պարունակում, ուր բանաստեղծը՝ ներշնչուելով «Երգ Երգոց»-ից, ինքնատիպ կերպով գեղեցիկ պատկերներ է կերտել.

«... Դու ի վերայ ծաղկեալ լեռանց

Անուշահոտ խնկաբերաց՝

Ճառագայթես լուսով փառաց.

Ձիւնատեսիլ սպիտակացան:

... Թէ տեսութեան քում հանդիպիմ.,

Որպէս շուշան լուսով ծաղկիմ.

⁸ Աղամգրի հրատարակողները 1721 թուականին, գրի տիտղոսաթերթի վրայ գրել են. «Արարեալ տէր Առաքել վարդապետի Բաղիշեցոյ և Սիւնեաց եպիսկոպոսի»:

⁹ Մ. Աբեղեան, Երկեր, հտ. Դ., Երևան, 1970, էջ 422:

¹⁰ Ա. Զօպանեան, Ա. Սիրնեցիի Աղամգրի, հրատարակուիմ Մ. Պոտուրեանի.- Ա. Ղազիկեանի թարգմանութիւնները, «Ամանիտ» հանդէս ամսեայ, Ժ. տարի, 1908, թիւ 1-2-3-4, էջ 2:

¹¹ «Բազմավէպ», Նախնեաց փերթումով, Առաքել Սիրնեցի Վենետիկ, 1913, մարտ, էջ 140-141:

Եւ որպէս հոս սիրով վառիմ,
 Փափաքելով քեզ նրադիմ:
 ... Կայթն ու խորիսխ ի քոյթ շրթանց
 Բըղխեալ բաշխեն պաքեալ անձանց.
 Դու ճառագայթ արեգականց,
 Զիս արասցես լուսաթափանց:
 Յօղ արտասուացս իմ սաստկագին
 Համայն գերկիր հեղեղեցին.
 Յոյց ինձ ըզդէմըս քո կրկին
 Ահեղակերպ եւ լուսածին»¹²:

Սիւնեցու տաղերից համեմատաբար ամենակատարեալը «Վասն փառաց սրբոց» քերթուածն է, որտեղ նա ապացուցել է, որ կարող է այնքան թարմ ու պայծառ գոյներով նկարագրել սուրբերի երանութիւնը, որքան որ մուշկ ու զարհուրելի գոյներ էր ստեղծել մեղաւորների անձկութիւնը, սարսափը կամ յաւիտենական տանջանքների զարհուրանքը պատկերացնելու համար: Այդ տաղը եթէ չունենար մի քանի թոյլ տողեր և կրկնաբան աւելորդ տներ, իր տեսակի մէջ հրաշակերտ պիտի համարուեր:

Աւելի ծաւալուն գործ է «Աղամգիրք» պոեմը, որն ունեցել է մի քանի տարբերակներ: Ա. Զօպեանեանն այն կոչել է «Վիպաբերթուած»¹³: Պոեմը բաղկացած է 1740 տող պարունակող տաս գլուխներից և արտայայտում է կորուսեալ դրախտի գաղափարը՝ նման Զ. Միլտոնի հանրայայտ գործին, բայց գրուած նրանից աւելի քան 250 տարի առաջ: Նիւթը վերցուած է Աստուածաշնչից և վերաբերում է Ադամի և Եւայի ճակատագրական մեղքի պատմութեանը: Հեղինակը կորցրած դրախտի ողբերգութեան աստուածաշնչական զրոյցը հարստացրել է բանահիւսական մոթիւններով, միջադէպերով ու պարականոն գրուածքներով:

Պոեմի գաղափարը նոյն բարոյագիտական կոչն է, առաքինի ապրելու պահանջը, որ Սիւնեցին իրագործում է գեղարուեստական հմուտ լուծումով:

Իր քերթողական հմայքը, մարդու անկման պատմութեան թելադրիչ ու ճոխ նիւթից հրապուրուած, փորձել է արտայայտել իր ողջ կարողութեամբ: Առաքել Սիւնեցին հետեւողականօրէն փորձել է կատարելութեան հասցնել իր ստեղծագործութիւնը և ամէն անգամ դժգոհ մնալով երեւան եկած արդիւնքից, սկսել է նորը գրել՝ նոր ձեւով: Հ. Պոտուրեանը հրատարակել է «Աղամգիրք» երեք տարբերակն էլ, որոնցից առաջին երկուսը աւելի համառօտ են քան վերջինը: Որեւէ տուն չկայ, որ Սիւնեցին վերցրած լինի նախորդ երկու «Աղամգիրքից», որովհետեւ վերջին «Աղամգիրք»-ը նախորդների սրբագրելով չի ստեղծել, այլ գրել է նորը:

ՀստԱ. Մաղոյեանի յիշեալ երեք տարբերակներից լաւագոյնը վերջին «Աղամգիրք»-ն է, որով Առաքել Սիւնեցին ընդլայնել է միջնադարեան հայ գրականութեան ժանրային տեսակների և յարաբերութիւնների շրջանակները: Հեղինակն այս գործում կնոջն ու սէրը պատկերել է մի նոր տեսանկիւնից՝ յաղթահարելով աւանդական կաղապարները: Նրա կերտած Եւան կնոջ ներաշխարհի համակողմանի ընկալման իւրայատուկ փորձ է¹⁴: «Աղամգիրք»-ը Առաքել Սիւնեցու գեղարուեստական մտքի բարձրակէտն է, ձեւի ու բովանդակութեան ներդաշնակ միաձուլման գեղեցկագոյն երկ:

Ուրախութեան ու բերկրանքի շողերի մէջ կորած դրախտի նկարագիրը կատարեալ մի պատկեր է, որի ճոխութեան մէջ հրճուում է առաջին մարդը:

¹² «Ամանիտ» հանդէս ամսեայ, Ժ տարի, 1908, թիւ 1-2-3-4, էջ 2:

¹³ Ա. Զօպեանեան, Ա. Սիւնեցիի Աղամգիրքը, հրատարակութիւն Հ. Պոտուրեանի.- Հ. Արսէն Դազիկեանի քաղմամուքիւմները, «Ամանիտ» հանդէս ամսեայ, Ժ տարի, 1908, թիւ 1-2-3-4, էջ 3:

¹⁴ Տէս Առաքել Սիւնեցի, Աղամգիրք, աշխ.՝ Ա. Մաղոյեանի, Երեւան, 1989, էջ 8:

**«Էր փառք դրախտին անպատմելի,
Չըքնաղագես եւ սըխրալի.
Ծաղկունքըն տայր փայլըս փայլի՝
Արեգական նման եւ լուսնի:**

**Դէմքն Ադամայ փառք ծաղկեալ՝
Եւ որպէս լոյս ճառագայթեալ.
Յովունք լուսոյ անտի հոսեալ
Եւ որպէս հոռ փայլատակեալ:**

**Դէմքն իւր ծաղկեալ էր զանազան,
Որպէս ըզլոյս արեգական.
Բոլրէր եւ հոտ անմահութեան
Բերկրեալ խայտայր ինքն ընդ ինքեան:**

**Ադամ ծաղիկ էր նորածին,
Լուսաբողբոջ զարնանային.
Փրթթեալ փառք ի մէջ դրախտին՝
Ծափըս ծափի տայր ի սըրտին:**

**Ջինչ հայելի պայծառ փայլէր.
Աստուած ի նմա միշտ երեւէր.
Եւ ճառագայթ լուսոյն հոսէր,
Ջանձամբ իւրով փայլատակէր»¹⁵:**

Բայց չարը խափանում է Ադամի դրախտային երջանկութիւնը. Եւան խաբուել է սատանայից և ճաշակել արգելուած պտուղը: Կինը դառնաղի ողբում է և փորձում համոզել Ադամին կատարելու ճակատագրական նոյն սխալը, որի պատճառով նրանք արտաքսւում են դրախտից, մտքով վերապրում նախկին երանելի վիճակը, զղջում կատարուածի համար և մխիթարւում արքայութիւնը վերագտնելու ապագայ յոյսով:

Առաքել Սիւնեցին վիպական ու քնարական տարրերի միահիւսմամբ բացայայտում է կերպարների վարքագիծը ու նրանց հոգեբանութիւնը, հաստատելով աւետարանական այն ճշմարտութիւնը, ըստ որի մարդն ունի ազատ կամք, ուստի և ինքն է միայն իր կատարած արարքների պատասխանատուն:

«Աղամգիւր»-ը ինքնատիպ մի ստեղծագործութիւն է՝ որոշակի գեղարուեստական արժէքով: Այդ արժէքին վնասում են սակայն Ադամի և Եւայի մեղանշման վերաբերեալ բազմաթիւ մեկնութիւնները, աղճատելով պոեմի կառուցուածքի ամբողջականութիւնն ու միասնութիւնը:

«Աղամգիւր»-ում հեղինակը նպատակ է դրել բանաստեղծօրէն պատմել Ս. Գրքի զրոյցը, ինչպէս նաեւ տաղաչափօրէն յօրինել հին մեկնութիւնները Ս. Գրքի զրոյցի մասին և յաւելել իր մեկնաբանութիւնները այլոց ասածներին: Խօսքը «մարդեղութեան խորհրդի» մասին է, որով բացատրել են Ադամի և Եւայի զրոյցը:

Առաքել Սիւնեցին ունի «Աղամգիւր» չորրորդ հատոր եւս, որ կոչւում է «Դրախտագիւր», որն ունի 1060 տող և քսան ճառեր կամ գլուխներ: «Հեղինակին նպատակն եղած է այս աշխարհի բնակիչներն իր հետ առնելով՝ փնտռելու ելնել այն անձանօք քաղաք՝

¹⁵ Առաքել Սիւնեցի, Աղամգիւր, հր. Մկրտիչ Պոստուեան, Վենետիկ, 1907, էջ 7-10:

ուսկից արտաֆունած էր Ադամ»¹⁶։

Ձեռագրի վրայ չկայ «Դրախտագիրք» տիտղոսը։ Այդպէս են կոչել՝ ելնելով ընդհանուր բովանդակութիւնից, որի համար պարտական ենք Ղ. Ալիշանին։ «Դրախտագիրք»-ը թուում է «Ադամգիրք» շարունակութիւնն է։ Եթէ առաջինում պատկերում է նախածնողների դրախտից արտաքսումը, նրանց դառն զղջումն ու ապաշար, երկրորդում միջոցներ ու պայմաններ են առաջադրում երկնաւոր դրախտը նուաճելու համար։

Մարդու անկումը և վերստին իր կորուսեալ երջանկութեան հետամտելու թեման կայ հին ժողովուրդներից շատերի մօտ։ Դա միջնադարեան քրիստոնեայ աշխարհի ամենասիրելի նիւթերից մէկն էր։ Մեր կրօնական գրականութեան մէջ այդ ուղղութեամբ առանձնապէս աչքառու են նոյն բովանդակութեամբ «Հարցումն Լուսաւորչին և պատասխանք հրեշտակին», և Վարդան Այգեկցու «Վասն դժխտց և անփոռ ուղոց» գրութիւնները։

«Դրախտագիրք»-ը հետաքրքիր է իր գեղարուեստական մտայնացմամբ։ Այն հանդերձեալ կեանքի նկարագրութիւնն է՝ դրախտային և դժոխային երկու վիճակներով, ուր մարդկանց վիճակուած է ապրել համապատասխան իրենց վարած կեանքի՝ սահմանելով ուրախութիւն և փառք անմեղներին և յաւիտենական տանջանք՝ մեղաւորների համար։ Պոեմի գլխաւոր հերոսը ինքը՝ հեղինակն է, որը Վիրգիլիոսի նման, Տանթէի «Աստուածային կատակերգութիւն» երկում, ուղեկցում է ընթերցողին դէպի անդրշիրմեան աշխարհ, ուր մեղքի մէջ ընկղմուած մեռեալ հոգիները խորհուրդ են տալիս կենդանի մարդկանց ապրել ազնիւ ու պարկեշտ՝ արժանանալու համար յաւիտենական արքայութեանը։

«Դրախտագիրք»-ը «Ադամգիրք» Բ.-ի պէս նոյնայանգ է, ուստի ձանձրալի են անընդհատ կրկնուող -եզ կամ -ես յանգերը։ Ծիշդ է, գրքում կան գեղեցիկ պատկերներ, բայց աւելի ընդարձակ տեղ են զբաղեցնում ձանձրալի հատուածներն ու կրկնութիւնները։ Լեզուն, ի տարբերութիւն «Ադամգիրքի», աւելի մօտ է աշխարհաբարին։

Առաքել Սիւնեցին ունի նաեւ այնպիսի տաղեր ու գանձեր հանդերձեալ աշխարհի և վերջին դատաստանի մասին, որոնք այս կամ այն չափով շօշափուում կամ նոյնիսկ կրկնուում են նրա «Ադամգիրք» և «Դրախտագիրք» պոեմներում։ Իր բարոյախօսական տաղերում նա խրատներ է տալիս քահանաներին ու ձաղկում նրանց վարքագիծը («Խրատք երիցկնոջ և քահանայից», «Խառնեալ վասն կուսակրօն քահանայից» և այլն)։ Որոշ տաղերում էլ մարդկանց բաժանում է վատ ու լաւ խմբերի և բնորոշում նրանց վարքն ու ժամանակի բարքերը («Տաղք վասն յատկութեան զանազան բարուց մարդկանց»)։ Նա նշում է 370 չարիք (շողոքորթութիւն, կաշառակերութիւն, կեղծիք, հաւատի պակաս և այլն), որոնց հեղինակ է համարում չար ոգիներին։

Որպէս կրօնական բովանդակութիւն ունեցող գրականութիւն, Սիւնեցու բանաստեղծութիւնները կարգացում են հեշտութեամբ։ Սրանք ունեն թեթեւ չափ և թարմ տաղաչափական ձեւեր։ Նա յօրինել է զանազան չափերով՝ անապետեան¹⁷ բազմավանկ բանաստեղծութիւններից մինչեւ հայրէնի կարճ չափերը։

Նրա ստեղծագործական ժառանգութեան մէջ ակնյայտ են գուսանական երգերի ազդեցութիւնը, չափազանցութիւնները, նոր պատկերներն ու հարուստ բառապաշարը։ Սիւնեցին օգտագործել է նաեւ ծայրակապեր՝ յօդելով անուններ և նոյնիսկ նախադասութիւններ։

¹⁶ «Բազմավէպ», Վենետիկ, 1913, մարտ, էջ 99, Մ. Պոտուրեան, Մատենագրութիւնք Առաքել Սիւնեցոյ յօդուածի մէջ։

¹⁷ Հին յունա-հռոմէական տաղաչափութեան մէջ՝ եռափունկ անդամ, որի առաջին երկու վանկերը կարճ են, երկրորդը՝ երկար, անապետ։

ՏՐՅ. Յ. ՊԵՏՐՈՍՅԱՆ

ԱՌԱՔԵԼ ՍԻՆԵՑԻՆ ԵՒ ՆՐԱ ԳՐԱԿԱՆ ԺԱՌԱՆԳՈՒԹԻՒՆԸ

Ամփոփում

XV դարի սկզբի նշանաւոր փիլիսոփայ, բանաստեղծ, մանկավարժ, մատենագիր, հոգեւոր և հասարակական գործիչ Առաքել Սինեցին Տաթևի դպրոցի վերջին մեծ ներկայացուցիչն է, ով հայ գրականութեան մէջ իր ուրոյն տեղն է գրաւում քնարական և խրատական քերթուածքներով, պոեմներով ու ներբողեաններով: Նրա «Ադամգիրք»-ը, տաղերը, ինչպէս նաեւ արձակ գրուածքները իբրեւ ներշնչման աղբիւր ունեցել են աստուածաշնչական, խրատական նիւթեր: Բացառութիւն են կազմում մի քանի կարճ տաղեր, որոնք ունեն աստղագիտական ականգնութիւնների տաղաչափութիւն: Իր գործերում նկատուում են տարրերի բազմազանութիւն, բարդութիւն, այլազանութիւն, որտեղ իրար են խառնուում աստուածաբանը, քարոզիչը, բարոյախօսը, քնարերգակը, դիւցազներգակը, աղօթողն ու աշուղը: Որպէս կրօնական բովանդակութիւն ունեցող գրականութիւն, Սինեցու բանաստեղծութիւններն ունեն թեթեւ չափ և թարմ տաղաչափական ձեւեր:

DC. H. PETROSYAN

ARAKEL SYUNETSI AND HIS LITERARY HERITAGE

Summary

Arakel Syunetsi, an early 15th-century well-known philosopher, poet, pedagogue, author, religious and public figure is the last outstanding representative of the Tatev school and has a special place in the Armenian literature with his admonitive writings, poems and odes. His “Adamgirq” (trnsl. “Adam’s book”), most of his verses and prose works are influenced by the Bible and preachments, with the exception of several short verses which are written in traditional astrological metre. His works are characterized by a variety and complexity of elements where the theologian, preacher, moralist, lyric poet, epic poet, prayer, ashug (troubadour) are all joined. As religious literature, Syunetsi’s poems are characterized by light metre and fresh